

**Ane'**  
**EPESES-nupoong**  
**Paula'ke Daarievuru'nane'**  
**Kara Baavootunanka**  
**Ane'kooning**

1:1 Kumponing Nii' Neraka'antamuru'na'  
 Karistoo'koo kuunge

4:1 Nii' Karistoo'nung Mono O'nori Kumponing  
 Bakaang Aarumo Oro'antavampiaing

**Kumponing Nii'**  
**Neraka'antamuru'na'**  
**Karistoo'koo kuunge**

(1:1-3:21)

<sup>1</sup> Aung ane' karavoto~ ning Paula'ke  
 Jiisuu' Karistoo' bakaang kara-okomui-  
 nkai Kumponing miru'muio' dii' bakan-  
 ing meekupoong Epesesia otorimaing  
 daarirerompimang, dii' ee'ning Karistoo'koo  
 baitorarimaatomaing.

<sup>2</sup> Biraanke ee'noko mooa dii'koo otoaing  
 Kumponing Niuma-itaing ee'noko teieta Oving  
 Jiisuu' Karistoo'.

*Kumponing Biraankemuru'na' Karistoo'koo  
 kuunge*

<sup>3</sup> Tampara tampampiaing tee-koo tee Kumpon-  
 ing ee'noko Bauma teie niikaang Oving Jiisuu'

Karistoo'ke, tee ee'nara Karistoo'koo kuunge biraankemuru' ookara biraankenankai Tanuaang Meekung-etaning paning-koo otoromainge.

<sup>4</sup> Aa'nong teroita kansi' mme' pupu'aravaruko-ita miru'muru' Karistoo'koo kuung o'noritaa' meeka'mariri o'norii'naang tuumpimaria' tee-koo dutakanoo'ke.

<sup>5</sup> Tee tee piaamuritaa' miru'muru' baurukaa' deemarii'naang Jiisuu' Karistoo'ke makosi-antamurio' baka bakaang piai, maroita.

<sup>6</sup> Teie tee' nkomuru' daangampampiaina' tee-koo avuavu' maneenung-koo Bauring Piaaru'koo kuunge avusiro'ari amuru'nung-koo.

<sup>7</sup> Karistoo'ke bakaang erenge moo'murira makosi-antamuriko Kumponinge niikaang oraka' nkonanka tonta'memurira unaa-antamuru'nung;

<sup>8</sup> Tee'koo bakei aa'na' maanto' bakaang piaae nii'koo piampuu'nunge,

<sup>9</sup> tee ee'nara bakaang mataue tavo'antavuu' bakaang noru' ninka Kumponinge sir-apo'antamemurima kapoo' makensi'nung teie tavo'anta-koo piavoko' Karistoo'koo kuunge.

<sup>10</sup> Tee aung ee'nara: Uripo'keta teie marovuko' tee Karistoo'koo ookara naru'urii'naang bateinang makotuko aa'ning paning-nupoong ee'noko kansi'nupoong, ookara-koo bore' deempari.

<sup>11</sup> Ookara kapoo' tee Kumponinge matauvuma miru'umana' nkoaramaung, ee'noko nii' tee'ke Kumponinge bakaning deemarii'naang miru'muru' Karistoo'ankoi tutuntomaa tampuu'na'.

<sup>12</sup> Bakaang matau ee': Nii' urompiri Karistoo'

nempampimainge nantoong daangang-antavarampiaing bakaang meenasi-koo.

<sup>13</sup> Ee'noko dii' ee'ning nari'ke, Karistoo'ankoi baitorariru'ning kara masikung taaraverira tee doorenang tampara dii' domanturiaing-koong. Ee'noko bakaning deentariko date'antaruri Tanuaang Meekung aruru' bakaning avurii'naang maraka-antavuu'nung.

<sup>14</sup> Tee Tanuaang Meekung nii' amuru'nung tee tasi'anta-koo nii'ke nkavampiaing ootukunung barenku tero naumuru'na'. Tee kompampirio' Kumponing asi'na'mung dupe-antavui oko-antamuraing, nii'ke tee daangampampiaina' meenasi-po'nung.

### *Nii' Tee Biraanke-koo Tantemariaing-koong Kungsi*

<sup>15</sup> Tee'koo ninge taaravamira dii' masika'anta oto'deruring Oving Jisuu'koo ee'noko diikaang paa ookara Kumponing bakaning meekupoong-koo,

<sup>16</sup> tenang-eta deto taararampira dotumaramaung kungsi-koo tantampima.

<sup>17</sup> Ee' eentamaramaung: Teie Kumponing nikaang Oving Jisuu' Karistoo' bakaange, Baumai Meenasi Okovenunge aruriaing tee Tanuaang matau dii'koo siraka'antavuaing bakaang karakoo miru'noo' dii'ke tasi'peria'naang tee Kumponing.

<sup>18</sup> Ning eentamaramaung diikaang domang-koong dutai siraka'antaruriko dii'ke tasi'perii'naang tee barenku bokumurira bamuru'nung, ee'noko bakei aa'na' maanto'

meenasi-po'ning otoromana' teing biraanke-nanka bakaning-koo meekupoong-koo maraka-antavuru'ning tankee'eeaining.

19 Ee'noko napo' eentamaramaang tasi'perii'naang iri' aa'na' pankaing nii'koo baitomarimaing-koo sipuing, paaranang-koo makosi deeaung.

20 Tee aa'nung iri' baukoni'ke kompui Karistoo' boo'keta daa'antavura tampavine-koo Kumponing-koo ba'nang-antavuu' paning-koo Ovoring-antavui.

21 Teenoo' Ovorinoo' tee deu basi anantenaung-koo: ookara tare-nupoong, pankainuka, purinto'po'nupoong, ovontung ee'noko ootukunung amutemurii' miring-po'nupoong, enanariong ee'noko dama'nariong napo' nari'.

22 Tee tee Kumponinge ookara kapoo'nanka Karistoo'koong kau'koo boong sipuma Karistoo' tee bore' deeng-antavuu' ookara kapoo'nanka-koo dootuu'nupoong tampa' pakuvuriaina', teing tee bakaang mono makosinuka.

23 Ee'noko tee-pina' bore' mono ninka be'nu'ura dupearapeu'na' tee' nari' Karistoo' dupe-anta baka dupearavaing ootukuarara.

## 2

### *Kumponinge Domamuru'na' Karistoo'koo Kunge*

1 Nii'ngang tee dii' doori otoriko' boto-toto' ee'noko oraka'nko nkoverima. Tee' nkoverima kansi'kooning biikaang aarumo narung siomperiko'.

<sup>2</sup> Sietani' siomperiko', ovonturi biikaang bore' auvi'au-eta bakaang muu' tareaamaing, tee ee'nara Kumponing siomeevanuka-koo meu'ke mintoomparamaung.

<sup>3</sup> Nii' ookara tee'ke tero niikaang orara aarumo-koo amarima karaa' dovange boo'koo niikaang mono ee'noko onou piavoko'na' nari' siompampiko'ning. Tee tee nii' domang oraka' o'norikotaa' Kumponing-nung kiimata kompampiaining akoing-pina' nari'.

<sup>4</sup> Teka teie Kumponing piaae maanto'ke aa'na' piaamurikotaa' bane nii' boto toto'ke moom-piri o'noriko domang-antamuru' Karistoo' ninka nari';

<sup>5</sup> Tee tee Kumponing bakaang avusiro'ke tee' domamuru'.

<sup>6</sup> Ee'noko domamurira Karistoo' ninka nari' napo' daa'muru' nari' tare-nupoong o'norii'naang tee ninka paninaumariri.

<sup>7</sup> Aing ookara kapoo'nanka tampa' nkomurima tavo'antavuu' tee-koo Jiisuu' Karistoo'koo dama'navarang nau-anta-koo bakaang avusiro'ke maanto'ari otomana' paaranang-koo makosi deeaung.

<sup>8</sup> Ai' Kumponing avusiro'ari domang-anta masika'antaveru'noo' deeko' domantariru'ning, dii'ka deea', bauta'durima.

<sup>9</sup> Kapoo' nkoveriko tee' domanturia' maku'koo. Maroita, naning daangampara'neeng-koo.

<sup>10</sup> Kumponing tee nii' o'norina' nari' nkomuru'. Teie Jiisuu' Karistoo' bakaning deemuri nkomuru' tampara nko-nko nkoevompimaa'noo'naang o'nori tero miru'muru'na'.

*Kumponinge Nii' Avitevitu Tapo'muru'na Karistoo'koo*

<sup>11</sup> Tee'koo tero oraka' otoriko'noo'koo ampa'doriauka'nung. Dii' teroita Ju'deea', dopa' toto'dariaruko'ning, tamunsi'nupoong tantaariko'ning, a'noo' teing tamung dau naro' dopa' toto'ke meeka'antavarima.

<sup>12</sup> Ampa'doriauka'nung tero tee dii' Karistoo'koong noru' otoriaruko', Isireelinupoong-eta taapo' otoriko'ninge, Kumponinge kara maraka-antavui naroompuu'na'koo damisimainkue, kansi'koo naro' bi'dariri domaang isikung nkana' noru' otoa', Kumponing pakurupeu'nung otoa'.

<sup>13</sup> Teka enang dii' tee teroita Pako'pari'nii' domanturira tareruriaing-koong ninka tapo'darira Kumponing-anko po'antarurining bakaang erenge tero taapo' isipo' otoriko'noo'keta.

<sup>14</sup> Tee tee Karistoo' tee niikaang mooa-nko. Teie tee naro'ka tapo'muring aa'ning Ju'nupoong ee'noko Ju' deeaing.

<sup>15</sup> Bakaang mono boo'koo avaru'noo'ke teie tee teteva'uu' tee ku'nung turanturang-koong siivenke'muri otoko'nung nii'. Moosesi-nung boto teka bakevui, mono etu-koong. Aing ookara kapoo' ee' oro' nkovuu'ning nerakariong nkovurii'naang aa'ning-eta Ju'nupoong ee'noko Ju'deeaing teie baka naro'kavurira pinau-antakoo.

<sup>16</sup> Aa'barata'koo boo'paru'noo' tee turanturang bake-antavuu'naang naro'kamurira ookavitura Kumponing-koo navitu-pina'.

<sup>17</sup> Teketa' pora teie karantavurima~ daankivuu'

tee doorenang tampara mooa-po'nung ookavitura-koo aa'noko Ju'deeaing ee'noko Ju'nupoong, dii' isipo'ke taapo'ke otoriko'ning-koo ee'noko teing Ju'nupoong tee-anko due'nupoong-koo.

<sup>18</sup> Ai' tee tee teie taung nkomemurio' nii' ookavitura Bauma-anko be'koo makotumpiri otong tee narung Tanuaang Meekung-koo kuunge.

<sup>19</sup> Enang tee dii' akoing damisimainku otoria', teka dii' osikaiaang deentari otoring teing ninka nii'ning bakaning meekupoong ninka nari', ee'noko Kumponing tarevurimaing-kooning dii'.

<sup>20</sup> Dii' Kumponing-nava kani-nupoong tee' pau'deeri otoring teing-koo kara okovuri nkanuka ee'noko nakaronuka~koo dau, Jiisuu' Karistoo' tee ee'nara ookara-koo e'manianare' makosi, tumanung.

<sup>21</sup> Tee-koo ootukunung nari' be'nu'ariri otoi kaniari otomaung dootuu'nava pankava deempari Ovoring-koo.

<sup>22</sup> Ee'noko dii' nari' tee-koo otoritaa' tee-koo kanirariri otoring Kumponing oto'doma deentari Tanuaang Meekung-koo kuunge.

### 3

#### *Paula' Ju'deeaing-anko Kara-okovui-nka*

<sup>1</sup> Tee'koo eentamaramaung dii'koo, ning ee'nara Paula', dii' pakurampimaung-koo dai'nisi Jiisuu' Karistoo' bakaang.

<sup>2-3</sup> Dii'ke taarameru' dee'ma tee kapoo' makensi'nung daarireromping-konaare ning-koo sira'pura Kumponing makosi-antamuu'na' bakaang pias dii' nau-anta-koo.

4 Anka deeruerima ooveriaing tampa' tasi'pamana' tee kapoo' makensi'nung Karistoo'koong.

5 Urikavarang pankaraamuriko tee sira'paravaruko' tee aung tee' enang Tanuaang Meekunge sira'antavuina' teing-koo bakaning-koo kara okovuri nkanuka-koo ee'noko nakaronuka-koo.

6 Tee ee'nara makensi'nung tee aung kapoo' teing ee'ning Ju' deeaing nii' ninka tapo'meering Ju'nupoong ninka nari' barenku nkavampii'naang narung mono-kooning deemariri ee'noko narung maraka-anta-kooning Kumponing deing, tee ee'nara Jiisuu' Karistoo'ke dupe-antavuu'nung tampara doorenang tavo'ura.

7 Kumponing tee maneenung taura' amuu' aung ee'nara doorenang tampara ookara nan-toong nau-koong, makosi-antamui bakaang iri'ke.

8 Ning-koo ee'nung-koo bakaning meekupoong ootukunung-eta asiranung masikung-koo Kumponing tampa' taura'mui amuu'nung daankiama'naang teing-koo Ju'deeaing-koo tee doorenang tampara Karistoo'nung avuavu'koong bono'dopa.

9 Ee'noko naumuu' siraka'antavama'naang ookara-koo tee Kumponing bakaang miru' makensi'nung.

10 Uripo'keta tee teie ee'narai ootukunung kapoo' nkovuu'nunge tee baka noru'ui otoko' enang bakaning dootuu'nupoong donkompurinamu' sira'paraa'naang avatevaro mataunanka aa'ning-koo ovontung ee'noko

iri'po'nupoong paning-nairu-kooning-koo.

<sup>11</sup> Tee ookara nkoaru'ning tee dupe-anta-koo tee Kumponing bakaang onou pupu'doma dopa-ita marovuu' tee-koo Jiisuu' Karistoo' niikaang Ovoring-koo teke taavoarara oparaa'naang.

<sup>12</sup> Ee'noko tee ninka narung deemariri masika'antavampima tasi'pampiri Kumponing-anko due'marira karavampiaing amaiaa'moria'.

<sup>13</sup> Tee tee enang kontampiri si'damping aa'dampima, tarua'doriauka' teing arikananka ninge dii' pakurampima kune'amaing-koo dii' meenasi-koo basi-anta-koong onoueri.

### *Karistoo' Kenkumpampaing-koong Kungsi*

<sup>14-15</sup> Tee tee tee tutumpama naurampirina' Kumponing tampa' nkoruru'nung-koo tee'koo ning kinkinama eentamaramaung Niuma-koo aa'nung-koo ootukuna'kantu paning-kooning ee'noko kansi'kooning miring tampariri otong.

<sup>16</sup> Kunsimarama ee' eentamaramaung: Teie bakaang avuavu' maanto'ui oto'keta aruriaing tee purinto' ee'noko iri' tanuaang Meekung-etaing diikaang pankaruntoong-koo otoaing, ee'noko Karistoo' diikaang domang-koo unaavoi otoi otoaing baitoverio'.

<sup>17</sup> Napo' eentamaramaang piasa-koo daue du'durira ari'arurita' iveka'darii'naang,

<sup>18</sup> ee'noko tee' nari' makosirariri otorita' tampa' tasi'perii'naang ookara ninka Kumponing bakaning meekupoong ninka ookanairu-eta paaranang-koo makotua' tee piasa Karistoo'nung.

19 Tee dii'ke mantomperi noru'erii'naang tee piasa punkaang~paa' dii' maanto'duri otoriana' Kumponing-pina' nari' nariari oto'ke ookarai.

20 Daangang otoaing Kumponing-koo deekorono' basiropa nkovumaung-koo eenta ee'noko noru'marimano'o'keta dau basinoo' tee ninka bakaang iri' nii'koo mintoomparamaung ninka.

21 Ee'nara daangampampimaatoaing dootuu'koo naru'marima Jiisuu' Karistoo'ke pakumurio', ookavarantue doomeeritaa' botu kong paa'na'. Ee', tee' ee'na'.

## **Nii' Karistoo'nung Mono O'nori Bakaang Aarumo Oro'antavampiang**

### 4

(4:1-6:24)

*Narung Onou Ninka O'noriaing Meeka'mariri*

1 Tee tee ninge Ovoring bakaang dai'nisie kontampiri botoramping makosina' bokururu'na' otorii'naang.

2 Boonko noru'dariaing, banainge otori da'deng iiraroria'. Piasa oro'antaveri otorimaatoai tokoona' noru'deeria'.

3 Tanuaang Meekunge tee dii' narung deeng-antarurining, teka aa'na' paarararimaatoai narung deentariri oto'koo mooareeri otorima.

4 Mono tee narung otong nii'ke nko-antavampimaung Karistoo'nung, ee'noko Tanuaang Meekung tee narunge tee' nari' narung noru'koo oto'koo bokururu'nung.

5 Oving narung otong, kapoo' masika'antavampimaung narunge, ntong-koo minkie meeka'anta narunge;

6 Kumponing narunge tee Niuma nii' ookarai, nii' ookara taremuri niikaang birenge mintoom-parama nii'koo kuung otomaung.

*Pakumeeriaina' Avuavu'nanka Ninka*

7 Teka teieta bakaang maanto'ui oto'keta Karistoo'ke nii' kantemuru' namarana' teing avuavu'nanka tee' Daari Meekunge minkuvuu'na' aa'puma:

8 “Tenang paning-koo deto koinura barampuri dai'nisinuka teie Ovinge tankaampuru' tee avuavu'nanka teing nantoong.” (*Kena 68:18*)

9 Tee “deto koinuu!”-naare miru' aming? Tee aa' miru' ee': Tee tero napo' siaru'nung depeto kansi'koo boonavaro-koo.

10 Tee ee'nara narung siaru'nung tee ee'nara napo' deto koinuu'nung paning-koo daunavaro-koo isipo' masipo' ootukunairu-koo maanto'antavaraa'naang.

11 Ee'noko tee “avuavu' tankaampuru!”-naare miru' aming? Miru' aa' ee' oro': Nii'ning kara okovuri nkanuka deempuru', napo' nii'ning nakaronuka deempuru', nii'ning doorenang tampara daankivuma nanu'nuka deempuru' ee'noko nii'ning tanata nkonanka nau-antavaarima.

12 Biikaang nko-nko Kumponing bakaning meekupoong bare-anta-koong dootuu'nupoong kake'iiariaina' ee'noko Karistoo' bakaang mono makosinuka panka'antavaavaina'.

13 Bera tee nii' ookara narung deemariaing masika'anta-koo ee'noko Kumponing Bauring noru'na'koo, ee'noko naning-naummariri petaa'moriaing nari' basina' Karistoo' dakaosi'na' dupeari petaa'omana'.

14 Teketa tee nantoong onou tasi'paa'nukai daang ampirinumparima~ aavamaariko toire' oki'nareka'pina' o'noriauka'nung amutemurii' daang-koong nau-anta siompampiritaa', aa'na' boo'ai nankara avitoitoi bii'urimana' dovinge uupuvuriko.

15 Otoa', masikung narung minkuampima pi-aameeritaa' ootukumariri panka'mariaing Karistoo'naummariri, tee-koo kuung o'nori, niikaang bore' deemparako.

16 Teie taremuriko nii' teing bakaang mono-koo-navio'nanka-pina' matauna' be'nu'mariri o'noring ee'noko naruna' makotumpiri pakumeeriaing nii' ookara tee ee'nara mono panka'antavampiri ee'noko purimariri piaae.

*Urikung Aarumo Sipampira Nerakung-koo Baremariaina'*

17 Aung tee nkaang naunau dii' naurampimang Ovoring bakaang miringe dii' date'antarampima: Akoing tamunsi'nanka-pina' nkorariauka' kapoo' masikung deeaung siompaamaing-pina'.

18 Teing biikaang noru' tee mutaanang, damisimainku teing tee-koo domaang Kumponing amurimaung-koo. Aming-koo, nna' papaaranuka koonto', bore'ke deerenuka otorokotaa'.

19 Anutua nkoarima maimaia'na' nko-koo avariri oto'nuka, naro'keta oko'okovurima aarumo ku'mi' nkoaamaing.

20 Teka tee Karistoo'koo barerariru'na' tee' deea'.

21 Dii'ke tee koonto' tampa' taaraveru' tee, ee'noko dii' tee-koo kuung otoritaa' bakaang kara masikung naurariko barorontariru'.

22 Urikanaung enang bakei kiru'dariaing teronung aarumo-koo otoriko'na'koong, mono narung bakaang noru' karaa'ke boo' tostitosi-koong siompui otomaung dii' orari-anta-koona'.

23 Diikaang onou ee'noko tanuaang neraka'antarariaing.

24 Nerakanaung kuruntariai Kumponinge nkonii'naung, tee-pina' oro'naung, koonto'nuka, meeka'dariri otoriaina' masikung siomperi.

25 Tee'koo enang bakerariaing tosi minku-eta. Masikung narung minkuerimatoaing tapo'deeri otorimaing ninka, ai' dii' teing narung mono-koo manta'deeri otong.

26 Dii' iirarorima deeko' tee iira oramuriau deeng-antaveriauka'. Bointuriai duaa' mme' tumparavaruko.

27 Sietani' doona aveauka' tee'.

28 Tee bakisipung bakiaa' nko-ita bakearara bakaang birenge mintoong tampara kake'iiari nkovuai apuka'paravaing ninka tankaampuaina'.

29 Kara orarananka minkueria' otoai, teka tampara to'biari kara narung, pakureeri navureerima. Tee'koo taararaariaininge tee tampa' taararaariaing biraankeario'.

30 Tee' nari' Tanuaang Meekung Kumponing

bakaang orarunsi-antaveria' otoai, ai' tee Tanuaang Meekung tee Kumponing bakaang taa'ni'anta nii' moo'muriaing-koong asi'na'mung.

<sup>31</sup> Donta'dariri otorimaatoai aing aa'ning-eta', domang oraka' noru', iira, ioo', peusi', minku-minku ee'noko napo' too'de.

<sup>32</sup> Teka navureeri otorimaatoai dun-sirunsi'antareerima, tonta'antareerima dii'ka Kumponing Karistoo'koo kuunge tonta'antareruru'na'.

## 5

### *Arakamariri O'noriaing Kumponing-nung Arakai*

<sup>1</sup> Tee'koo dii' Kumponing baurukaa', teie piaarurimaing, paararariaing tee-pina' nari' oto'koo.

<sup>2</sup> Piaareeri otomatoai tee' Karistoo'ke piaa-muru'na' ee'noko tee baka nii'koo avaru' tee boontunang tampa' nuuraa' Kumponing-koo.

<sup>3</sup> Kaukauro-nko, ee'noko noru' ku'mi' siong, nii'noo' makosi deea'na' karaa' bakei dii'koo otoauka'nung; minkueria' otoai Kumponing meeka'antansinuka deentariri.

<sup>4</sup> Napo' kara sikuri'ke si', kara kanu' ee'noko deu' makotua' dii'ke minku-koo. Tampa' tang narung dii'ke minku-koo makosi.

<sup>5</sup> Koonto' tasi'peri noru'eriaing naning tee kaukauro-nko, naning kiiroraa' deeaung, nii'noo' mamaironto' tee oto'evuauka'nung barenku-koo Karistoo'ke ee'noko Kumponing tareaaremaing ninka. Temurii' karaa' siong kumponing daang-koong boontuvuma-nko.

6 Ee'namurii'koo Kumponinge iira basi-antavumaung teing-koo bakaang kara siompaavaing-koo. Taaraveriauka' nii'ninge nii'na' nauraariko kara menaankavoroma.

7 Tee tee teing ninka nari' manta'deeri otori-  
auka'.

8 Tero tee dii' mutaanange maanto'duri otoriko'ning, teka enang arakai Oving-etainge maanto'duri otong. Tee tee enang araka siraka'antaveri nanirimaatoaing.

9 Noru'eriaing tee ee'nara arakai aing aa'ning tavo'antavumaung: tampara aarumo, aarumo koonto' ee'noko kara masikung amutemurii'ari.

10 Ee'noko io' paaraverira ooveriaing aming-  
koo Oving dotuaramaunge.

11 Temurii' mintoong mutaanang-koong kapoo' basiaravaing-koo kanto'daria' otoaing, teka sira'periai temurii' aarumo orara.

12 Kapoo' makempario' nkoaamaing bakei maremaare, maimaia'na' taara minku-koo.

13 Tek a tenang sira'pevurereriko teie arakai tee biikaang oraka'nko orara-pina' tasi'pario' sira'puaing. Ee'noko daamparimana' tasi'parira nii'ning tee arakavariaing napo'.

14 Tee' ee'na' kenai minkuvumana' aa'puma,  
“Tanteraravai da' aasi' bauko. Boo'keta  
daa'darako Karistoo'ke da' araka-  
antaruaing.” (Aisaia' 26:19;  
60:1)

*Aampari'marima Tanuaang Meekunge  
Maanto'mariri O'noriaina'*

15 Enang tee araka-koo otoritaa' tarereriri otoriaing dii' otoriaina'koo, tampa' mataurariri, kanu'aapena' deea'.

16 Tee' nkorarima doona siperiauka', ai' enang batei orara, doong arikung.

17 Tee'koo kanu'dariauka', teka paaraveriai noru'koo Ovoring bakaang pia.

18 Purinto'naru'ke baru' naikirima kanu'anta-koo bakerariai diikaang domang ootukunavaro orari-antarari'neeng, teka Tanuaang Meekunge maanto'duri otoaing.

19 Tee' otoritaa' kenanankai karareerimaatoai aa'ninge Daari Meekung-koo daarinii'ninge, Ovoring daangang-koo nantoonge toroaamainge ee'noko Tanuaang Meekunge karantavuko~ kenanankai. Diikaang domang-eta kenararima amutemurii' ninka kovirariaing Ovoringe taararuriaina'.

20 Ookara batei-koo tampara tamperimaatoai tee-koo Kumponing tee Niuma, niikaang Ovoring Jiisuu' Karistoo' bakaang miring-koo.

21 Ee'noko aroo'antareeri otorimaatoaing Karistoo'koo mee'du'pirariri.

### *Nii'darintu*

22 Dii' bii'ankaaru' dii'unkaampi-koo aroo'dariri otorimaatoai Ovoring bakaang kara aroo'erimana',

23 ai' donkaani tee manikuma bakaang bore' tee'pina' nari' Karistoo' dootuu'nupoong-koo bore' deempari otomana', bakaang mono, ee'noko tee tee baka domang-anta tee mono-koo.

24 Tee tee tee' nari' dootuu'nupoong Karistoo'koo aroo'ariri otoromana' tee' nari'

dii' bii'ankaarui' dii'unkaampi-koo aroo'dariri  
otoriaing.

<sup>25</sup> Dii'ke bii'unkaampie dii'ankaampi  
piaaverereri otomatoai tee' nari' Karistoo'ke  
dootuu'nupoong piaavuri bakaang mono  
avaru'na'.

<sup>26</sup> Tee' nkovuu' teing naro'ka ba'aang  
makosinavitu deempariko tevitu kiiroraa'antavui  
meeka'antavuu'naang aa'noma ntonge duu' kara  
meeka'anta-koong ninka.

<sup>27</sup> Karistoo'ke tee' nkovuu' tevitu bakanavitu  
tee-anko pipiraari donkonuu'naang nerampari,  
ku'mi' dovang dopai, naankuviraa', meeka'nisi,  
dakaosi'.

<sup>28</sup> Tee' nari' bii'unkaampie bii'ankaampi pi-  
aavaarimatoaing, tee' biikaang mono bii'ka pi-  
aavarimana' nari'. Baa tee naning ba'aang pi-  
aavumaung tee baka piaavaramaung teni pi-  
aavui.

<sup>29</sup> Naning bakaang mono munte'aramaung  
otoa', teka tee mono bau'aramaung piaavari  
tanatavarama, tee' nari' Karistoo'ke bakanavitu  
dootuu'nupoong tanatavurimana'.

<sup>30</sup> Tee' nkorariaing dii' bakaang mono-koo  
manta'deeri bi'dariri otorining deentariko.

<sup>31</sup> Tee' Daari Meekunge minkuvumana'  
aa'puma,

“Tee'koo naninge baumararing sipureta tee  
ba'aang ninka dai'arara tenaanka narung  
deempareaing.”

<sup>32</sup> Kapoo' pankaing masakung aung-koo baku'ari  
miru'ari otong, nka ninge ee' ooamaang:  
Aung kapoo' Karistoo' ninka bakanavitu

dootuu'nupoong miru'uri oting.

<sup>33</sup> Teka sira'pari otona'koo ee' otong: Dii'ke naruna' naruna' dii'anakaampi piaaverererimaa-toai tee' diikaang mono dii'ka piaararimana' nari'. Ee'noko ba'aang ba'ung-koo mee'du'piari otoma-toai.

## 6

### *Nii' Biurukaa' Ee'noko Nii' Biumaraang*

<sup>1</sup> Toire'ke tee diumaraang Oving-koo tampa'taaraverererimaatoaing, ai' aung tee dii' diikaang nko-nko.

<sup>2</sup> Daari Meekung-koo ee' otong,  
 “Daumararing deto noru'eresi pakuereaing. Tee' nkorarama tee anke kansi'koo pankaroong tampa' otoaing.” *(Boto 5:16)*

<sup>3</sup> Aung tee tutuna'nung boto Kumponing-etaing maraka-anta ninka mavo'pari oting.

<sup>4</sup> Dii'ke biumaraange diurukaa' iirang-antana' nkovereria' otoai, teka tampa' tanataverereriai Karistoo' bakana' kake'ii-antavereri, bakaang kara bare-antavererima.

### *Botovotonaa'nuka Ee'noko Teing Tare-nupoong*

<sup>5</sup> Dii' dai'nisinukai teing dii' tanataraarimaing anke kansi'koo makosina' ankanpereri mataa'irariri siompererimaatoai tumsi paakararia', tee' Karistoo' dotu-antana' noru'eri.

<sup>6</sup> Nantoonge ooraarii'naang tampa' nari' mintoontaria' otoai ako' dotu-anta-koo, teka dii' Karistoo' bakaning botovotonaa'nuka deentariko domange tampa' noru'eri mintoontariaing Kumponing-koo.

<sup>7</sup> Doturotutaririri pakuereriaing kara siomperi – Kumponing noru'eri, nantoong noru' ereria'.

<sup>8</sup> Noru'eri otong Ovinge tee nantoong ookara kapoo' tampa' nkoaamana'koo tampa' maku'uriaing aa'ning dai'nisinuka ee'noko dai'ariaing nari'.

<sup>9</sup> Dii' oko-nupoonge tee tampa' tarevereriainge teing diikaning tee' nari', mau'mau'eria' ee' noru'erima: “Nii' ookara taremurimaung otong teke paning-koo nari' noru'muri, duukung sipuaunge.”

*Nopa'mariri O'noriaing Kare-koo Makotumpiri*

<sup>10</sup> Asirang-koo ee' naurampii'naang: Purintariri otoriaing Ovinge-koo bakaang iri' iirakuta ninka.

<sup>11</sup> Nopa'dariaing ootukununge Kumponing bakaang mononopa' tavu'koonge tee ninka nari' Sietani'ke aavaruriko dimpa'eriaina'.

<sup>12</sup> Aming-koo, nna' nii' tee nantoong tumuusinanka ninka tameeria', teka aa'ning ninka: ma'nari-koo ovontung avatevaatang-koo neriariri otoroi Sietani'koo kuunge, paning-nairu-kooning-koo oravitu bakei maare ninka tameering, mutaanang-aapei ootukunung kansi' booni'antanuka enanaroong-koo.

<sup>13</sup> Tee'koo nopa'dariaing teie Kumponing bakaang mononopa'ke ootukununge dii' dimpa'dariaina' doong ora'mung basiarako, ee'noko kare oparako dii' tee tee' nari' tampa' donkoniri otoriaing.

<sup>14</sup> Tee tee tampa' pinka'dariri donkoniriaing. Kara masakunge tokoni'pina' tokorariai. Koom-pari oto' si'daravai murukeu-nee'pina'.

15 Maamurariri otoriai tee tampara doorenang mooa-koong nkavui nanu'koo tee' piatooronuka~koo tutung kau'koo boonamante~ baraa'arimana' maamuariri.

16 Napo' teing ookara ninka baito komperiai kapatau kompaamana' tumpari' nta'po'ning siri-vaa'uko taamparavaing teie orarai, Sietani'ke, bai'uko.

17 Ee'noko deto komperiaing tee domang-anta Kumponing aruru'nung tee-pina' diikaang baakopo. Napo' komperiai tee Kumponing bakaang kara tee-pina' bainatu tavu'koong Tanuaang Meekung-etaing.

18 Tee' Tanuaang Meekunge pakururimana'koo ookara batei-koo kunsirarimatoai amutemurii' paku nka-koo baitorarima. Ee'noko tee' nkorarima muung ee'noko doong mantontariri eentaevurerereriai Kumponing bakaning meekupoong ootukunairu-koo.

19 Ning tee'ke kungsi-koo pakumeriai tenang ninge kara daankiama'naang nkomarako naumuaining-koo, tampara doorenang makempari otoko'nung noru'antavarampaina' amaiaa'moa'.

20 Temurii' kara nka-koo botomuu'nung deemarako entamemuriaing amorompa' daankiampaina' makosina' bane dai'mari o'noitaa'.

### *Asi'naare*

21 Enang tee ninge Tikikas dii'anko botoa-maang tee mmaiko' masikung ee'noko Oving-koo mintoompama mutekaro'arakoo'.

<sup>22</sup> Teie naururiaing nii' o'norina' ee'noko ninge nkoamaing kapoo', ee'noko diikaang domang kuaa'antaruriaing.

<sup>23</sup> Mooa ee'noko piasa tee ninka masika'anta tee dii'koo ntara'mainkaang-koo otoaing Kumponing Niuma-ita ee'noko tee Ovoring Jiisuu' Karistoo'keta.

<sup>24</sup> Biraanke otoaing dii'koo niikaang Ovoring Jiisuu' Karistoo' piasa o'paa'ke piaaverimaing-koo ookara-koo. Tee' nari'.

**Kara Naroong-anta Nerakung Kongarana'  
The New Testament in the Naasioi Language of Papua  
New Guinea**

**Nupela Testamen long tokples Naasioi long Niugini**

Copyright © 1994 The Bible Society of Papua New Guinea

© Faith Comes by Hearing

Language: Naasioi

Dialect: Kongara

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

---

PDF generated using Haiola and XeLaTeX on 18 Apr 2025 from source files dated 31 Aug 2023

0fe571ca-6209-55e0-bc3e-74b7123016b1